

窮山毒獸相逢思念是經獸自潛退不傷爾  
身若度大江遭風遇浪思念是經河海靜波  
蛟龍出迎若入火中思念是經身不被燒火  
自滅光若入時病萬鬼之中思念是經鬼消  
毒滅病者自康若抱厄疾思念是經災厄即  
脫永保長生若在窮乏絕糧之地思念是經  
咽蒸服御使得飽滿若在困圍幽閉重權思  
念是經罪閉釋散不充罰刑若逢宰官吏司  
所錄思念是經結縛即解吏皆懼然若有冤  
家思念是經心懼意解及成至親若逢寇賊  
白刃之中思念是經賊自却退刃不加身斯  
經並為三界護度衆生危厄之難度脫三塗  
離免八難五苦之中皆所不經廣覆無外福  
量難稱有宗是經可謂無量之門也  
太上玄一真人告仙公曰吾受

太上玄一真人說妙通轉神入定經

正一天師清微弟子 洪百堅 製作  
道教學術資訊網站

太上玄一真人說勸誡法輪妙經  
道言夫輪轉福慶不滅生而好學宗奉師寶  
與道結緣世世不絕皆由先身積行所致如  
此法輪上士勤尚廣開法門先入後身救度  
國王損口極之標形衣寒仁及鳥獸思遠有  
生恭師奉法恒知對神長齋苦思精研洞玄  
吐納蒸液心灰意勤割棄色累萬想無派情  
和悉柔入神並散如此之行一滅一生志不  
退轉尅成上仙三師備足身登太極伍加仙  
卿中士篤好志慕在玄關度一切度厄解患  
施功布德建立福田君親忠孝素智懷仁願  
樂三寶晨夕修研虛心有道口味靈篇燒香  
敬華洞入道門餐不念飽衣不嫌寒苦不為  
倦樂不為懼勞不怠懈困而殊勤衆行並備  
三滅三生意志審固尅得飛行上遊太清補  
九宮真人下士修身斷情忍色服御養神速  
棄榮麗棲憩幽林愛山樂水耽耽靜真淡泊  
守固絕穀休糧長齋念道過中不味端坐則  
與師寶相對出入則與鳥獸為羣孤旅巖穴  
獨景空山思不慕歸悲不悼形契闕林澗切

栢擬餐面有餓容心如懷丹艱苦備嬰恒有和顏見試不恐心靜神安如此之行上感虛皇九滅九生志願不退執固殊堅尅能變化乘空飛行遊宴玉嶽逍遙太無從此而進位至高仙凡學得道如此自然十方上真衆仙已得正道四方無極世界塵沙而來真人從無數劫皆受太上靈寶洞玄真一勸誡法輪妙經輪轉因緣皆藉先世之功以得今日之道莫不由其前行積善所致此法玄奧非愚情淺智所可明了唯得道之人體其入妙乃悟生死不滅功過相藉如經之行已得成至真矣

道言夫受滅度因緣不絕得生人道聲色瑞偉相好具足才智明達解了玄義或生貴門王侯之家或爲人尊四海所崇男爲國主女爲妃后世生貴子代代不休或生於富室財寶充足凡百施爲無所缺乏如此之德皆由其前身行業積善願念所致或處在窮厄不泰之地艱辛憂惱愁苦難忍乃發願慈心思念作善竭力建功施種福田割已救物損身

度人忍饑守廉不敢怨天心不念殺口無惡言敬愛道士唯善而行功滿德備一滅一生其福無量得如今之報若能又於今生抗志易韻棄穠學道宗師受經長齋念真不妬不害誠口慎言愛師重寶存諫不忘當藉先世之基二滅二生便得神仙三官九府記入功過毫末必載萬無差失其願既定志亦難奪故倚伏難窮所謂法輪之門

道言諸道士及百姓子男女人或生而好道奉師受經於家於奉施安高座朝夕朝禮齋直燒香無有懈怠愛好三寶恒如饑渴廢家既樂不務生業不婚不害不淫不殺守情忍色所管在法如此之行皆由其前身供養道士勸助師宗奉香然燈建立福田損身施惠救厄卹貧功滿德普一滅一生得如今之業

從此不退便坐致神仙縱道業未備運應更輪轉得尸解會成真人也

道言吾歷觀諸天從無數劫來見諸道士百姓子男女人已得無上正真之道高真真人自然十方諸聖皆受前生勤苦求道不可稱

計投身棄命無有限量廣建功德發大乘之心長壽若行市語香油然十燈百燈千燈無量之數光映十方照耀諸天瞻冥普消金寶珍貨以散道路供給窮乏損身割已奉師效心無吝惜心念前生不得如今當盡心開度衆生預是爲獸首不歸仁於是惠澤流溢功德諸天身得金剛七十二相項有圓明洞映太空位登高仙此福巍巍難可稱述如此之比有無數之數皆積行所得非唯一生學而成也來生爲學入吾法門當瞻之先世以期神仙功滿德普冠入自然至真之場也今說法輪偈頌三篇

無上八門開度法輪偈頌曰

吾開八門 中有玉城 七寶瓊林 無根而生  
金條穿互 陰映上清 開度法輪 通真達靈

上無不照 下無不明 見有道士 晨夕誦經  
長齋山阜 不倦晝冥 切栢中餐 素水兼濡

躬師受法 時刻不傾 單景巖穴 獨宿孤征  
與鹿爲羣 倚林棲形 窮默對躄 飛鳥哀鳴

風雲凄切 萬枯沉零 凝冰填澗 素雲翳庭

寒癆切肌 執志殊精 契開林岫 艱苦備嬰  
勞不敢倦 極不敢寧 屢轉求道 遂感皇情  
丹書綠字 列圖玄名 神仙羽服 錦扇飛青  
鬱然而降 煥落火鈴 流霞丹與 三素燕軒  
入我八門 乃知死生 皆由積行 苦哉有情  
此一偈出太上玄臺高上老子歷觀八極謂  
之八門而誦此篇也

轉輪減度行業偈頌曰

法輪開滅度 死生從願迴 積基有明報  
禍福更相催 世眼求前生 達士希後歸  
前生功未滿 故致福報遲 積先勸來行  
功備形自飛 前世十方仙 歷劫乃入微  
吾觀至學士 乃不頌人懷 勤行奉師寶  
師祐福巍巍 輕師失吾寶 先功永無施  
勸誠成爾真 三師度玄扉 若能體道真  
法輪洞自開 莫見此寂寂 幽冥中甚微  
此一篇出虛皇無上道君開無無中而觀求  
生歷頌此篇以勸誠入無也

轉輪命根未盡偈頌曰

轉輪空洞魂 滅度更死生 罪福各有對

吉凶無偏嬰 得道行所致 緣爾先身精  
行惡招斯酷 流曳五苦庭 天地雖悠悠  
玄鑿理甚明 吾歷觀汝輩 從師受吾經  
得經叛汝師 始嫉爭功名 輒軒不自咎  
緣路吐怨聲 致使六部司 執筆糾爾刑  
命滅負刀山 苦惱身是嬰 往反三塗中  
豈覺形與名 化為六畜羣 望反其冥冥  
法輪有常運 去留無稽停 哀此禍福元  
受報不賈生 念汝不知命 發頌傷我情  
此一篇出虛無正真皇上天人歷觀來生行  
業行罪有負逆之對勸誠入真行大慈之心  
頌此篇令知宿命之根也

太上玄一真人曰吾昔受無極太上大道君  
無上八門開度法輪勸誠經頌修行道成位  
加真人此文與元始同生包含天地億劫長  
存廣度一切為諸律梁輪轉勸誠以教導三  
乘廣覆無外開死度生其福無量諸天所宗  
學者所憑也其文妙重皆授宿有玄名帝國  
錄字三清應為仙公之人自非其質不得妄  
宣見其篇句皆由宿福積行所鍾能盡心供

養依法修行宿根自滅與善結緣世享福慶  
家門興隆身受開度未得入無為之場尅成  
真人也輕傳漏慢考滅爾身

太上玄一真人說勸誠法輪妙經